



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 3



Iraq nung US sepai menüngdak: PM al-Kadhimi

Union Home Minister-i Greater Sohra Water Supply Scheme lapoktsü



VOL. XVIII NO. 282 (ADOK 282) DIMAPUR

TENTONÜ (MONNDAY) CHITENI (JULY) 26, 2021

₹ 5.00

Physiotherapy course aginürtem atema temetetsü

Dimapur, July 25, 2021 (TYO): Osangkaket balala nung rejutemi physiotherapy course indang osangtem prokshiba atema Indian Association of Physiotherapist Nagaland Branch (IAPNB)-i tekümdangtsü kar metetdaksüogo. "Physiotherapy ya Paramedical course ka masü aser paramedical mesüra rehabilitation council kübok madener. Talisa, National Commission for Allied and Health Care Professional Bill yangluba ajanga tarutsü

anogotem affiliated/registered junga masüba rejutemi tetsükdaksü ajurutsü akok" ta Deobarnü IAPNB-i sangdong ka nung metetdaksü. "Maharashtra, Delhi, Gujarat, Kerala amala state council kübok aliba rejutem nung ang Physiotherapy course agitsüla. IAPNB-i admission maparen mesüra rejutem den tesentaktem mali saka osang jangjanürtemi 6009-075522/7005713151 number tem ajanga tongteprateptsü akok" ta IAPNB-isa ashi.

Th. Muivah temang tajungba kümogo

Dimapur, July 25, 2021 (TYO): Honibar nikongdang NSCN-IM general secretary Th. Muivah temang mejungi akümba agi Christian Institute of Health Sciences and Research (CISHR) nung anioka anepaludar aser pa tajungba kümogo ta osang angazüker.


Core Committee on Naga Political Issue (CCNPI) den senden ka amenba sülen anogo ka lir NSCN-IM general secretary Th. Muivah dak COVID-19 puteta liasü ta osang ajanga ashi.

Th. Muivah tajungba kümogo aser medical team-i kanga junga anepaludar. Pa temang tajungba akümba nung ajemdaker mozü kidang nungi yoktsü, ta ta CIHSR osang ajanga metetdaksü.

"Arishi küm 87 tain Muivah dak COVID-19 puteta lir saka pa dak shirangba yimya kecha mali. Pa temang nung blood pressure aser oxygen saturation level shitak dang lir" ta CISHR (Referral Hospital) Director, Dr. Sedevi Angami-ia osang metetdaksüogo.

Taoba hopta Dimapur nung

Amit Shah-i Naga yimten tebilemstsü atema jembishinü tenzüksü tuyur



Amit Shah (File photo)

Neiphu Rio-i Shillong nung Amit Shah den ajurutepa senden amenba sülen iba osang metetdaksü.

"Naga yimten tebilemstsü atema jembishinü joko tatembang kati arur. Ita pungu shi ka jembishinü anena lir aser iba jagi Union home minister-i tekaratiba nung telemtetba agitsü atema sendaka alir ajak dang jembishinü tenzüksü shiogo" ta Honibarnü CM Rio-i ashi.

Shillong, July 25, 2021 (Agencies): Union home minister Amit Shah-i Naga yimten tebilemstsü den sendaktepa alir ajak dang jembishinü tenzüksü atema tetuyuba agütsüogo. Nagaland chief minister

Nagaland chief minister Neiphu Rio menden ser Parliamentary Core Committee on Naga Political Issue (CCNPI)-i taoba hopta Dimapur nung NSCN-IM aser NNPGs den mapang balala nung ajurutepa sendentem menogo.

DDCF-i Dimapur nung jenjang azüoktsü ayongzükur

Dimapur, July 25, 2021 (TYO): Dimapur District Citizens' Forum (DDCF)-i Dimapur nung bangdak ketdangsurtem dang nungdakba ajak nung jenjang atuba azüoktsü atema ayongzükogo.

Tang nungdakba ajak nung aser talisa petrol-diesel-LPG nung jenjang atuba ya azüoktsüla mesüra iba ajanga sensotem kangasa timtemtsü. Anungji, bangdak ketdangsurtemi jenjang atuba azüoktsüla. Iba wara anema rara nung nübortem nem timtem talila bentsür marutsüla saka akokba tashi nübortem yaritsüla ta Media Cell, DDCF sangdong nungsa metetdaksüogo.

Dimapur nung wara atema tenokdangbatem agüja aliba aser nisungtem mapa inyakkak mali timtemba mapang ka nung kechisarena ajak nung jenjang atuba atema tebilemstsü khuret abener, ta DDCF-i sangdong ka

Aboi district tentetsü nenshir



Deobarnü Aboi District Demand Committee (ADDC)-i osangbenertem den jempidang tangokba noksa nung angur. (Dimapur, July 25, 2021)

Dimapur, July 25, 2021 (TYO): Mon district kübok Aboi ADC headquarters nung alirtemi district headquarters akümtsü atema takhangba agütsüba nenshia metetdaksüogo.

"Mon district nung assembly constituency 9 lir aser iba nungi Aboi ADC headquarters kübok assembly constituency 4-i Aboi, Longching, Chen, Mopong Hongkong aser Tobu (upper Konyak area) lir. Aboi ya Konyak lima tiyongtsü lir aser tongtipang jila aser tesem ajak den sendaktepa lir" ta Deobarnü Aboi District Demand Committee (ADDC)-i

metetdaksü. "Aboi district akhangba ya kanga tim dang aser iba state sorkar nem kulikaket agüja aliba ajaki iba takhangba metentsür. Aboi nung district akümtsüsa nütsüng yongsük, township aser tanga ajak agi temsüa lir" ta ADDC convenor, Manpon Changkap-i tanü osangbener dang ashi.

Aboi district tentetsü akhangba ya Konyak nung lemdangtsüba masü saka terenlok atema lir, ta paisa ashi.

"Aboi district tentetsü akhangba ya 2008 nungi tenzüker aser iba 2011 küm state cabinet nem

memorandum ka agütsüogo. Taoba chief secretary Lalthara alidang district tasen tentetsü atema No. 1 nung Aboi aser No. 2 nung Noklak liasü" ta Changkap-isa ashi.

Parnoki state sorkar nem temepishiba shidi ka zülüogo aser iba denji district profile aser Konyak Union o ENPO tesem meketa aliba kintem nungi No objection certificate dena agütsüogo, ta ADDC-isa metetdaksü.

State sorkari nübortem taginüba angateta Aboi District tentetsü imlar, ta parnokisa ashi.

COVID-19 Nagaland: 68 dak putet, 85 taneptsü angu & 4 asü

Kohima, July 25, 2021 (TYO): Deobarnü Nagaland nung nisung 68 dak COVID-19 aliba putet aser nisung 85 taneptsü angu.

"Tanü nisung 68 dak COVID-19 aliba putet. Parnokji Kohima nung 25, Dimapur o Mokokchung nung ter pungugu (15), Peren nung 10 aser Kiphire, Mon o Longleng nung kaka (1) lir. Parnok züngsema nisung ajak agi 27,308 kümogo" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Deobarnü COVID-19 puteta alir nisung 85 taneptsü angu. Parnokji Kohima nung 51, Dimapur nung 17, Mokokchung nung 11, Kiphire nung 4 aser Peren nung 2 lir. Parnok

züngsema nisung 24,715 tashi taneptsü nguogo" ta paisa ashi.

Nagaland nung COVID-19 nungi taneptsü angurji 90.5% kümogo aser tang nisung 1,285 anepaludar, ta Dr Kikon-isa metetdaksü.

"Deobarnü COVID-19 puteta alir nisung pezü asü. Parnokji Dimapur nung nisung 3 aser Mokokchung nung 1 liasü. Tanü asürtem züngsema nisung 542 süogo saka nisung 14 bo tanga tashidak ajanga asü" ta paisa ashi.

"Nagaland nung COVID-19 alitsü akok ta temolung melemba sample 254,260 tendangogo. RT-PCR ajanga 101,733, TrueNat ajanga 66,511 aser Rapid Antigen Test ajanga 86,016 tendang" ta Dr Kikon-isa

metetdaksü.

"Honibar tashi nung nisung 594,906 nem COVID-19 vaccine indang dose 732,539 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,678, healthcare workers 15,952, arishi küm 45 ser temapur 180,445 aser arishi küm 18 nungi 44 tsünga alir 337,831 lir, ta paisa metetdaksü.

"Vaccine agirtem rongnungi nisung 137,741-i dose anaprong agiogo. Parnokji frontline workers 37,741, healthcare workers 12,166, arishi küm 45 ser temapur 87,449 aser arishi küm 18 nungi 44 tsünga alir 277 lir" ta Dr Thurr-isa ashi.

Küm 6 tsünga Petrol aser Diesel nung central excise duty kanga tuogo

New Delhi, July 25, 2021 (Agencies): Taoba küm 6 tsünga petrol nung Central excise duty anasü agi teimba küm 88% tashi ajungketogo. Kasa mapang, diesel nung excise duty asemü agi teimba küm 209% ajungketogo.

Iba ajanga India nung totzü jenjang litre nung Rs 100 adenogo.

July 1, 2021 nung petrol

atema central excise duty litre nung cess dena Rs 32.90 liasü. Ajisüaka, July 1, 2015 nung cess dena petrol litre nung Rs 17.46 dang liasü. Iba ajanga küm 6 tsünga excise duty anasü agi teimba akümba sayur.

July 2015 aser July 2021 tsünga diesel litre nung 209% ajungketogo. July 1, 2021 nü cess dena central excise duty litre nung Rs 31.80 per liasü saka July

1, 2015 nungbo cess dena litre nung Rs 10.26 dang liasü.

Linük nung tongtipang yimti pezü- Delhi, Mumbai, Chennai aser Kolkata nung petrol litre nung Rs 100 adenogo aser diesel litre nung Rs 90 nungi Rs 98 tsünga lir.

Linük nung yimti aika nung aser talisa Rajasthan aser Madhya Pradesh nung petrol litre nung Rs 100 adenogo.

Tanü Northeast nung tzunglu kanga arutsü

Guwahati, July 25, 2021 (Agencies): Hombarnü Arunachal Pradesh, Assam aser Meghalaya kübok tesem aika nung tzunglu kanga arutsü ta India Meteorological Department (IMD)-i metetdaksüogo.

IMD-isa Sikkim, Nagaland, Manipur, Mizoram aser Tripura nung tesem kar nung tzunglu kanga arutsü ta ashi.

Sikkim, Arunachal Pradesh, Assam, Meghalaya, Nagaland, Manipur, Mizoram aser Tripura

kübok tesem kar nung tsüngmok den tsüngi dena tzunglu arutsü ta IMD-i ashi.

Hombarnü Western Himalayan Region aser northwest India lendenlen tzunglu aru tenzüksü, ta parnokisa metetdaksü

Covid putetaka meshirangertem pei kidang takdang balaka nung mongdaksür, idangji -



Pei alidak aser ayipdak mopong aitsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzu aser juice jemang. Pei meyong mobile phone, kumesü aser toothbrush nung ama melentepa tamshi. Mozü achitsü agüja lira, aji shitak chiang. Tango junga mesashitba, teku ashiba, aketba aser temang metaba timtem lira yakta doctor bushiang.



Tir Yimiyim

Aor senmang indang film sayatsü



Dimapur, July 25 (TYO) : Tanü alima aso 21 buba nung alir lanurtem asoshi Aor senmang amangtepba sobalibaren kar nung benteta aotsü nungdak reprangteta, Aor lanurtem rongnung film yangluba maparen nung züngashia aliba takoktet lenir, Wb. Bendang Walling aser kaket zülur aser yimten nung ketdangser Wb. Sentilong Ozüküm nati anir film ka tenü agi 'Senmang' sayatsü renema lir. Iba Senmang film ya ajunga yimjak nung masayadang, nübertem nem jelia metetdaksütsü asoshi shilem kar sayaogo. Iba 'trailer' shilemji Hill Theatre Youtube channel nung angutsü.

Iba Senmang film ya tamalen Wb.Sentilong Ozükümi züluba kaket ka tenü agi "Dreams and Chaos" nungi agiteta, Dimapur Ao Baptist Arogo nung lanurtemi "Moloti" indang film yanglurtem kasa telok Hill Theatre purtemi yangluba film ka lir aser District Administration Mokokchung, DLCW-MSK (BBBP) Mokokchung, Sakhi One Stop Centre, Mokokchung aser Watsü Mungdang purtem longjemer teyari agüja adoker.

Iba film nung kibong ka nung kinungsü den jala asem toktsür kinungbo alima nungi piladoker. Iba sülen kinungbo adianutemi parnok lia aliba ali kimong aser kiojenji amanglemtsü meranger.

Indangji jalatemi parnok tebutanubo aser tambu nungertem dang akhi tsürabur ali senmang aser tanü asüng peisasa ajangzükteba ali rongsen na tepila angatetdaksütsü meranger. Ajisüaka, tesüsabo parnok ken o ji yimten okadakang bendanger.

Iba film nung tongti shilem agir actor aser actress-temji Süngjemmongla, Imtinaro, Renemsongla Ozüküm aser Süngküm Aier nungertem lir. Iba film ya mapang minute 50 shi agia reprangtetsüsa renema lir.

Iba Senmang film ya taruba ita August nung ajaki reprangtetsüsa sayatsü sentong yangludagi.

Taoba minister aser Interim Body züngsem T Kikon süogo

Dimapur, Chiteni/July 25 (TYO): Taoba mapang Nagaland nung minister inyaksang aser Interim Body nung züngsema alisang T Kikon mapang tatsüka shiranga arur Deobarnep Wohna nung süogo, ta kinungertem osang ka ajanga ashi.

Pa ya arishi küm 88 liasü aser pai kinungsüm tanur tenet aser semchir aika yutsür süogo.

Pa ya Nagaland Legislative Assembly nung Bhandari Assembly Constituency nungi mezüng 1964 küm NNO ticket nungi shimteta liasü. Iba sülen pa ya taoba chief minister Hokishe Sema aser JB Jasokie na kübok cabinet minister anaben aser MLA kümsük pezü inyaka liasü.

T Kikon ya 1960s tetenzüklen de-facto legislative assembly (Interim Body Member ama) tenzüka arur 2008 küm yimtenren mapa nungi anisüngzük liasü.

Pa yimtenren nung tetsüng ajemoka aliba mapang Nagaland nung nübur ajunga asoshi mapa tajung jenti inyaksüogo aser state renloksü atema committee aser lokti tentet balala nung shilem agia aru.

Wokha district tentetba, Bhandari sub division tentetba, Mount Tiya College, Wokha amenokba, Don Bosco School, Wokha amenokba nung pai shilem tulu agia liasü aser Kyong Academy, koba dang Lotha Academy ta aja, yangjia pa tir mezüngbuba liasü.

Pai Lotha nung kenshi-oshi terenlok asoshi temolung kanga agütsü aser 1961 küm Lotha Literature Committee tenzüksü asoshi inyakteper rongnung pa ya ka liasü. Paisa English aser Lotha oshi nung kaket kar zülüogo. Aser item rongnung Lotha oshi agi pa indang takum otsü kaket, "Beyond the Banyan Tree" ya zülua liasü.

T Kikon asüba osang angashia pa kinungsü Athelo Kikon dangi Nagaland Governor R.N. Ravi-i shidi ka züluba nung, Nagaland amenteter tebutem rongnung ka, T Kikon asüba asoshi ni temolung kanga shiranger, shiba Interim Body Member ka ama aser state sorkar nung Minister ka ama nübur tenzüker July 25, 2021 nü Wokha nung asü, ta shia liasü.

Asür T Kikon ya nükla tulu aketba lenir ka liasü, shibai tensa aika nung pa takum mapayui nokdak aser Nagaland nung aliba



T Kikon

nüburtem tarutsü jenjang jungdaksütsü aser yimchiyimjung lidaksütsü asoshi anibelem mesasai inyakogo, ta Governor Ravi-i ashi.

Pa asüba ya India nung aser Nagaland nung aliba nüburtem asoshi tejangja lenir ka samaogo.

Nagaland nung aliba nüburtem densema asen linük nübur aser ano kü kija tenü nung asükhu lemsateper.

Tsüngremi mangyimer kibong nem tashi tasen den temolung nung suneptsüba agüjang ta sarasademtsür. Asür tanüla teti tatem maka tesunep nung anisüngzükjangma, ta Governor Ravi-i ashi.

Tanep, July 25, 2021, Wokha nung Interim Body Member aser taoba Minister Tsenlamo Kikon asüba osang angashia aoksar aser jashir, ta NDPP tir Chingwang Konyak-i sangdong ka nung ashi.

1969 küm Nagaland Legislative Assembly nung künaprong züngsem ka ama Asür Tselamo Kikon den ni metetepa akum aser iba mapang pa ya Tsüngrem tsüpuba nisung ka, ta ni nguteta liasü. Pai nüburtem asoshi mapa tajung jenti inyaksüba rongnung ni ka jungjunga bilemtetbaji, 1973 küm Wokha ya district ka kumdaksütsü asoshi pai akhang akhanga nokdakba ni kodanga mamar, ta Chingwang Konyak-i ashi.

Pa asüba ya Lotha nung kisüng atema masü saka Naga nung ajunga asoshi takoksa tulu alitsü aser pa asüba ajanga tawa adokdaksüba asüngtsü tasak asütsü, ta ashi.

Ozü kibong den NDPP züngsem ajungai mangyimer kibong den asükhu tejashi lemsateper aser tulusang Tsüngremi temolung nung anisüngzük agüjang ta sarasademtsür, ta paisa ashi.

Old NST Parking Site, Kohima ya nüburtem asoshi yutsütsü



Dimapur, Chiteni/July 25 (TYO): COVID-19 tashidak wara ajanga alima takong kumdaksür aliba taneptsü ngudaksütsü nükjidong nung Ministry of Housing and Urban Affairs ajanga taoba küm September 11 nü "Streets for People Challenge" tenzüka liasü. Yimtem nung mera balala kanga kera inyakba ajanga yimtem nung nüburtem jajatetsüsa aser rongsenketzüng, lendong balala nungi kumzükba aser tanurtemi saputsüsa yanglutsü asoshi iba sentong ya tenzü.

2020 küm September ita nungi tenzüka yimti nung Cycle nung senzürtem (Cyclists), tetsüng agi senzürtem aser tanurtem, teintet rogo aser mata-mabensartem densema nüburtem nem lenmang sadema yutsütsü atema awareness agütsütsü mechi Kohima Smart City ajanga sentong balala ayongzük arur. Yimtem nung gari aser gari anentsü atema kisüng masü saka nübur ajunga

atema yimti telungzük nung lendong timtem maliba tesem aser ano züngdong-lidong asoshi lir ta nüburtem nem angatetdaksütsü asoshi sentongtem ya agiyonga arur.

Iba mapa atema tesem ana shimtet, New NST nungi Razhu Point aser PHQ Junction nungi Fire Station tashi.

Yimti nung aliba designer atema Design competition ka ayongzük aser iba Design ya tang Old NST Parking site nung tendanger, kong June 17 nü Planter Bollards tem amenoka lir.

Smart City kübok Multi Level Car Park projects renemtsü ataba mapang Regional Transport Authority ajanga New NST nungi Razhu Point tashi ya "No Parking Zone" asütsü atema October 9, 2020 nung sangdonga liasü.

Kohima Smart City den Kohima Traffic Police aser Kohima Village Youth Organisation dang iba melen Old MLA Hostel compound

nung Parking Site ka anepalutsü asoshi May 17, 2021 nü temelaba agütsü.

Item totuyuba nung bendenloksema Kohima Smart City ajanga "Streets for People Challenge" design tendanger aser July 24, 2021 nungi tenzüka Old NST Parking Site ya "No Parking Zone" alitsü, ta Kohima Smart City indang CEO nungi July 23, 2021 nü sangdong ka ajanga ashi.

Iba dak sendakba nung nüburtem gari anena ayutsü atema Old MLA Hostel ya amshitsü aser iba tesemi aitsü atema Kohima Ao Baptist Church jakdang Old MLA Hostel Gate nungi aitsü aser Commissioner Office len nungi adoktsü.

Yimti nung "No Parking Plan" sentong mapa kuma inyaka aoba tangya phase mezüngbuba lir aser ano meilongi TCP Gate Junction nungi Razhu Point/Old TATA Parking tashi atema gari anena ayutsü temelen tesem bushitsü.

Kohima Press Club pur lokti senden menogo

Dimapur, Chiteni/July 25 (TYO): Kohima Press Club pur 2021 küm asoshi mezüngbuba lokti senden July 24, 2021 nü LCS conference hall nung mena liasü, kong züngsem 36 aden aseriba mapang Club aser züngsemtem atema ken o balala jembia liasü.

Küm shia lokti densem amenba nung züngsemtem adentsü asoshi September 14, 2019 nung telemtetba agia aliba ama iba senden nunga nenshia jembia liasü. Ajisüaka tang COVID-19 tensa mechi taküm lokti senden anaben dang alitsü lemtet.

Club inyaksangshi, talisa lokti senden nung shilem magiba ajanga iba lokti asoshi khuret mabenba aser jangra maliba sayur, anungji züngsem shibaisa lokti senden ka nung dang medenlir tasüngdangba alitsü, aser kuli tejangja makai lokti senden ana nung atonga

madenba züngsemtem nem 'show cause notice' agütsütsü aser iba sülen senden nung madener indang züngsem reprangshitsü, koba 2021 küm asoshi alitsü, ta senden nung lemsteta liasü.

Züngsem saru kanga junga sarutsü aser jangjateptsü atema iba senden nung lemteta liasü.

Osangbener temi timtem balala ajuruba osangtem lir, anungji züngsemtemi iba ama timtem ajuruba ya Club nemo sang agütsütsü. Iba atema Executive Council ajanga ken o asadangtsü aser taitüsü osang sangdongtsü akok, mesüra mera tali agitsü atema lokti senden ayonga jembitsü, ta lemtet.

Kohima Press Club pur küm shia amungba asayamung (sports day) anogo ya October ita alitsü renem, saka ibai tensa dak apir amungtsü lemteta liasü.

Union Home Minister-i Greater Sohra Water Supply Scheme lapoktsü



Deobarnü Union Home Minister Amit Shah den Meghalaya chief minister Conrad K. Sangma nati East Khasi Hills nung Greater Sohra Water Supply Scheme lapoktsüdang tangokba noksa nung angur. (Shillong, July 25, 2021)

Shillong, July 25, 2021

(Agencies): Deobarnü Union Home Minister Amit Shah den Meghalaya chief minister Conrad K. Sangma nati East Khasi Hills nung Greater Sohra Water Supply Scheme lapoktsüogo.

Iba sentong nung DoNER minister G Kishan Reddy, MoS for DoNER BL Verma, MoS for science and technology Jitendra Singh aser Meghalaya PHE minister Renikton Lyngdoh nungertem aden.

Greater Sohra Water Supply Scheme ya Meghalaya sorkari apiteta yangluba lir aser iba atema 2019 kum DoNER ministry-i NESIDS kübok Rs. 24.08 crore lezmüksü.

Iba mapatong ajanga Sohra

jila den tesem 12- Sderkariah, Khlieh Shnong, Maraikaphon, Pdengshnong, Nongrim, Pomsohmen, Nongsawlia, Mawkisyiem, Saitsohen, M a w p u n k y r t i a n g , Pynshadkhurai aser Kutmadan nem tzi agütsüsü.

Wah Lyngksiar aser Law Sanlait Spring Sources nungi tziüji atsüa agütsüsü aser nütsüing yongsük 22,943 nem tzi agütsüsü.

Tanü Amit Shah-isa Sohra Afforestation Project lapoktsü. Iba ya DGAR aser Meghalaya sorkar yaritepa yangluba lir.

"Prime Minister indang Jal Jeevan Mission nung shilem ka ama DoNER aser Meghalaya sorkari North-East Special

Infrastructure Scheme kübok Greater Sohra Water Project mapa inyakogo. Iba nung Rs 25 crore endokogo aser kilen shia nem tzi tajemtsü agütsüsü" ta Union Home Minister-i ashi.

"Tziü tajung mejemra nübortem temang anema malitsü anungji PM Modi-i Independence ngur kum 75 ajungba aser ano Meghalaya state ngur kum 50 ajungba tenung nung Meghalaya aser linük nung kilen shia nem tziü tajemtsü agütsüsü nükjidong lir" ta Shah-isa metetdaksü.

Meghalaya nung kibong 2,80,000 nem tziü tajemtsü agütsüsü atema mapa inyaker aser iba ya mapatong tilala 1874 lemsar inyaker.

Baghjan lendong nung police 4 densema nisung 9 yiru

Dibrugarh, July 25, 2021

(Agencies): Honibarnü Tinsukia district kübok Baghjan nung lungkak aiter aser police tsüingda raratepdang lungkak aiter 5 aser police 4 densema nisung 9 yiru.

Baghjan oil field nung lungkak aitertemi lenmang nokdangar lia Tinsukia Police-i süng agi züka parnok senshidaktsüsü merang aser injang khatoktsüsa aküm.

Baghjan mi lendong nung takoksa ajururtem nem tememok agütsüsü atema takhangba agüja taoba hopta nungi lungkak aitertemi Baghjan oil feild leni aoba lenmang mokdangar.

Police-i süng agi lungkak aitertem züka senshidaktsüba mapang nisung pungo yiru, kasa mapang lungkak aiter temi lung agi police dak ona liasü aser idangji police 4 tashi yiru, ta police-i ashi.

Iba tensa azüoktsü asoshi onoki tear gas shell aser rubber bullets amshitsüsa aküm, ta parnokisa ashi.

Lungkak aiter tem ya Baghjan nung alirtem lir aser yaküm Tinsukia district nung Oil India Limited (OIL) indang Baghjan gas well apokba lendong nung takoksa ajururtem lir. National Green Tribunal (NGT) ajanga atakzükja ama temenok shitak agütsüsü asoshi parnoki takhangba agütsür.

Taoba hopta nungi parnoki Oil India Limited nung inyakertem lenmang nung senzüsensongertem nokdangar lungkak aita aru.

Honibar anepdang Tinsukia district administration nungi ketdangsurtem den police aser CRPF personnel tem iba tesem tashi tonga ao aser lungkak aitertem dang lenmang aitsütsü asoshi mepishia liasü.

Aiben mepishiba sülen lungkak aitertemi mangba agi police-i tashiyim amshia parnok senshidaktsütsüsa aküm.

"Tesüiba anogo ishika nungi lungkak aitertemi Baghjan oil field-i aoba lenmang nokdanga aru. Parnoki garitem aser Oil India Limited indang osettsüset abenba garitem iba lenmang ajanga aotsü memela" ta Tinsukia SP Debojit Deuri-i ashi.

"Atakzükja aliba ama temenoktem ajak magütsü tashi parnoki gari mesüra nisung senzüsensongba nokdangtsü molungtet" ta Deuir-isa ashi.

"Lenmang nokdangba lapoktsü asoshi onoki parnok dang o tajung agi angateta ashitsü merang, saka parnoki tashi manga. Iba yongji parnok senshidaktsütsü atema onoki tashiyim amshitsüsa aküm" ta Deuir-isa metetdaksü.

"Parnok rongnung nisung kari police dak lung agi aon aser ibaji ajanga police-i rubber

bullets aser tear gas amshitsüsa aküm. Parnok rongnung nisung pungo tashi yiru. Kasa mapang police pezü tashi yirua liasü. Lungkak aitertemi police dak lung agi aonba mapang gari ka onsatsü" ta paisa shisem.

May 27, 2020 nü Baghjan oil field apokba sülen kum ka jungogo aser iba lendong nung takoksa ajurur nisung teimbaka temenok ajak mangu lir ta lungkak aitertemi ashi.

OIL sangdong ka ajanga ashiba agi, iba lendong nung takoksa angur nem shilem balala lemsar temenok balala agütsüdar aser parnok rongnung teimbaka waiting list nung lir.

"Tanü tatalokba onoki khukhua aitsür. Lungkak aitertem atema aria bilemstüsü melen sorkari tashiyim amshia parnok merenshir. Tanü atalokba ajak ya sorkar aser district administration khuret asütsü" ta Baghjan Gaon Milanjyoti Yuba Sangha president, Satyajit Moran-ia ashi.

"Yaküm Baghjan lendong nung takoksa ajurur kibong 173 nem lakh 25 aser kibong 437 nem lakh 20 tememok agütsüsü asoshi NGT expert panel ajanga latetja lir. Ajisüaka, tanü tashi nung kibong 12 nem lakh 25, kibong 161 nem lakh 15 lakh aser kibong 439 nem lakh 10 dang agütsüogo" ta Moran-isa ashi.



OFFICE OF THE

AO SENDEN

H.Q: MOKOKCHUNG : NAGALAND

Ph: 0369-2228896/ e-mail: aosenden@gmail.com

PRESS RELEASE

Date: 25/07/21

Asen lima nung COVID-19 tanabuba tziüsem tesashi nungoka aiter, asen atepzüng tashi nung iba wara yagi jentipur dak kongshia tasüba tashi ajurua arudagi. Iba wara azüoktsü atema Nagaland sorkari temzüng ozüng lateter iba tashidak wara den raradaki. Mokokchung District nunga District Task Force nung Deputy Commissioner arkhudong sür yimtsüing tilatiba tashi nung temzüng ozüng lateta yur iba tongpang nung nokdaka lir. Aji oda iba wara azüoktsü mechi nung lokti senden tulu atenshia mekatetsüsa alima yimsüsüba bangdak ajanga temzüng ozüng yanglur aliba tensa tia ka nung asen Ao kin asoshi sobaliba benjongmong tongtipang rongnung ka, Tsüngremmong mongpu ajurushitsüsa atar.

Anungji iba tashidak wara nungi asen lima aser nübur ajak kumzuka alitsü mechi nung, asen Ao Litsü kübok Jila aser Yimtsüing tem nung taküm iba benjongmong amongdang bendanglen aser tesem bala nungi nübu atenshia lokti senden tulu mayongi Sorkari lateta yutsüba temzüng ozüng kübok ajaki anidak nung ajungtsü ta ayongzükur.

Sd/-
Chubawati Longchar
President

Sd/-
Imtipokyim
Secretary

NE nung tetsür rongnung mezüngbuba

D. Litt angur Prof Niru asü



Prof Niru Hazarika

award takok angur tetsür rongnung Niru mezüing liasü. La tawabangba kübok nisung 70 dak temai Ph.D renemogo.

Northeast, government, politics aser human rights nung Prof Hazarika-i public administration tsütsü takotet ka ama inyakogo.

Lai kaket balala zülüogo. Item rongnung "Public Service Commission of India", "Ethnic Autonomy in Northeast India: A Search for an Answer", "Insurgency and Beyond" aser "A Century of Civil Service in Northeast India" dena lir.

America, England, France, Netherlands aser Spain indang educational conference tem nung, Niru-i shilem agiogo. Lai züluba research paper tem national aser international journal balala nung adokogo.

Taoba Assam chief minister ana - Sarat Ch. Sinha aser Hiteswar Saikia na yimsüsüba mapang, Dr Niru Hazarika-i Assam indang yimtenren wadang nung dena shilem agiogo.

Taoba CM Hiteswar Saikia yimsüsüba mapang, Dr Niru Hazarika ya state government indang political adviser ama shim aser Cabinet jenjang agütsü.

Prof Hazarika asüba osang angashia, lennirtem kaketshirtem aser temulunger aikati mangyim jashi lemsatepogo.

Assam chief minister Himanta Biswa Sarma-ia Prof Hazarika asüba osang angashia mangyim lemsatepa liasü.

"Ni kanga dang akhüm tsübuba tesayur Dr Niru Hazarika asüba osang angashia jashiseter. La tesayur nungtugu ka liasü aser Northeast nungi D Litt award angur tetsür rongnung la mezüing liasü. Political Science nung ajemdaker lai kaket balala zülüogo. Tang ama mapang, lai toktsür aoba adianu aser kinunger tem den asükhu lemsateper," ta Twitter ajanga Sarma-i lemsatep.

Guwahati, July 25, 2021

(Agencies): Assam nung nungtugu educationist aser Gauhati University nungi taoba mapang dean of faculty of arts Prof Niru Hazarika Deobar anepdang 3:45 ako meta Guwahati nung asü.

Gauhati University nung taoba Political Science professor Niru ya Gauhati Medical College and Hospital (GMCH) nung Covid-19 ajanga asü. La arishi kum 73 liasü.

Tesüiba ita ishika nungi Prof Niru Hazarika shiranga aru. Yaküm December nung la ajungbena dang stroke asü aser Guwahati kübok Down Town Hospital nung munga anepalua liasü. Taneptsü anguba sülen tan ita (July) la ano alanga teberem yiru.

Down Town Hospital nungsa la operation takok ngua agiba sülen taneptsü angu. Ajisüaka, Niru kidangi shilangba sülen la dak Covid19 positive putet.

July 21, 2021 nü la GMCH-i anir ao aser Deobar anepdang la taküm mekümzükteki iba akümüli nungi piloadok.

Prof Hazarika, shibai Gauhati University nung 'dean of faculty of arts' ama inyak, la ICSSR, New Delhi nunga züngsem ka liasü. Gauhati University nung kum 30 jungnüa, lai political science department nung professor ka ama inyak aser iba University nungi lai la mapa toktsü. Iba University nungi Niru Hazarika-i MA renem.

Northeast nungi D.Litt



TIR YIMYIM YIMOBILEM (EDITORIAL)

DIMAPUR TENTONÜ, CHITENI (JULY) 26, 2021

Olympic nung tetsür Chanu

Tang tasayadak Tokyo Olympics nung arishi küm 26 tain Manipur tsür kati taret ajunger tutetba nung tanabuba takok jenjang ngutetba agi alima tsüngdang India nümadangdaksüogo. La ya Manipur tsür saka Tokyo nungbo Manipur masü India tsür. La tenüng ya Mirabai Chanu lir, chanu ta asü dangbo Aor chanua ta sünütsüka saka Aor chanubo alemli T. Aoi London Olympics nung oagi shilem agiba dak alaka, tanü tashi Aotsür Aor chanu rongnungi arütsü alema oagi tangar den toktepa asayatsüsa madoker. Ibaji tanü lanur tendak Aotsür Aortem asoshi dang masü saka Naga nunger chanutem ajak asoshi tayongzükba tulu asütsü. Manipur nungibo ano tsüngtepba nung Mary Kom alimai meteta kümogo. Ano, football aser hockey ama nung Manipur nungi asayartema aika adoker. Aji oda, Manipur ya telongpur telok tapu aika aliba aser longkak aita dang aliba lima ka dang masü saka alimai metetsüsa nungtugu asayartem adokdak lima ka lir. Ibajongji, Manipur nungbo Sports Univeristy tashi lapokogo. Iba denji kodang asenoki Dimapur nung yanglutor akaba state stadium aser Mokochung nung akaba Imkongmeren Sports Complex ama medemdangdir, asenokbo ano akhidang süjen agi ball yanglur lishi melanga aser auyi ponga asayaba jenjang nung to agi talangkabo mepilai lir ta medemdangtetsü. Asenoka tangar state nung ama Youth Resources & Sports department lir aser Sports school-a lir. Ano, tajung mesüaka asayadak ground makaba Naga nunger yimtsüngbo kata malitsü. Iba jagi Naga nungertemi asaya jangraba shisatsü aser tanüla sayur. Ibaji kodang bilemdangdir, asenok state government-i tang dang nungi temulung tagütsüba agüja, Naga nunger lanurtem dak asayatsü sempet aliba yagi hon taribi kümdakja parnok yaritsü tangatetba aser temulungtetba nung inyaktsü nungdak repringtetter. Manipur nunger amaji Naga nungertema tar tatsü, aso tila, shi ango achir kin, timtem arema inyakba nisungtem, nisung tara, anungji teyari tila agüja tera nungkettsü nung Manipur nunger chanutem dang nungibo tekaraba asemtsü, taretba ajungkettetsü, tajungba tsüngtetptetsü aser tajungba asayattetsü purtem lir. Iba jagi Naga nunger chanutema Mix Martial Arts nungbo tajung karbo adoka angur. Yakanü Tokyo nung Mirabai Chanu taret ajungshishiba nung tanabuba takok jenjang nguli, India tir aser ato kilonser na pronglai yimjak nung tenüngsang agütsüba den, Manipur Chief Minister-baibo lai takok anguba asoshi pelaba tamaitüsü sen crore ka senpet agütsütsü nangzük aser yakta la tang teinyakdak railway mapa nung temaba jenjangi tudaktsütsü mesüra Mary Kom ama laa Rajya sabha nung tatar kümdaktsütsü tebilemba lir. Aji koda? Nagaland nung asünungbo, ashiko, laji kechi kin? kechi tzükong? kechi constituency? kechi party? koyimer? ta tatidang aika ajanger külenang Tokyo-a tongla aser takoka anguyonga item tasüngdangtemji tama langzula. Asen lima nung Tsüngremi moatsüba lanurtem dak aketba sempettem mamshiteti leper nung rema yutsüba timtemji, tanga nungi masü, maparen ajak nung meindang aser ochimashi (corruption) nungi adoker. Asenokibo lanurtem nem stadium ka yanglutsütsü agibo, ibaji küm aika agia merenemi estimate aiben revise süa takar akümtsüang arishitsü. Asenokibo asayartem chiyongtsü tajung agüja anepalutsüba teindok amai bilemstü. Asenokibo asayartem nem ball mesüra bat mesüra racket mesüra süoshi alia agütsütsüba maparentem nunga luzüka agir oset tamajung, jenjang dalangba bushia alia agütsütsü. Asenoki asayatsü sempet Tsüngremi agütsüba ya asayamenü oset amai ka dang kümdaktsür. Iba jagi Olympics atongtsüba yutsür National Games a metongtetter. Hau, kechi mapa nung südir süaka alima nung tajungtiba aser tematiba jenjang atongtsüba yagi dak tuluba keta lir. Alima nung nungtugu asayartem taküm kuliji repringdangra, parnok aika ali kidang lia, süngben tüzüda oa, süjen ball asayaa tenzükba nungi nungtugu akümbatem lir. Asayar shingaia machimajemtsü machir aser majemer, anü adoka memejanger, kazülongzua mesenzür saka kenü anogobo nia alimai meteta nungtugu asayar ka akümtsü ta bilema, kechi inyakdir temulung ajak agi nümadangdanga inyaker, timtem aremer aser meranga tanen makai inyaker. Ibaji repringteta Tsüngremi yarir aser government nungi aser lokti nungi teyari arur. Asenok lanurtem daka iba tejangraba tanülajali alitsüla. Aji oda, kodang lanurtemi pei sempet meteta tanen makai meranga inyakba o state government-i temulung agüja inyakba na ajurutepdar, iba lenjem nungi jagi Olympics atongtsü aser süjen ball aser asentzü agi hon taribi akümtsü.

OLEMSABANG

Tanü putu nung yimsüsürtem ya tsünü-i san küp sümer nüburtem madak yimsü asüpa mesüka lir

- R. Imkong Lkr, Dimapur.

Tanü lima ya tashi temetet agi sünga aliba lima ka nung asen nüburtem liyonga odagi (odaki). Yamaji tanü putu mapang nung nisungtem ya kechi komala ka shia meteter lider liaka parnok ajakji alima yimsüsüpa tashi tulu keta aliba Govt. ka kübok liyonga aotsüsa akümer. Aji saka shir yimsüsüba mapang nung tashi alia amshidir par nüburtem jagi yakta lakteta toker alir, aji oda nüburtemi mapang tetemsü ka repringshimer tashi tait lennir tajung ka shimteta par Govt. ji melena bener aotsüsa akümer. Tanü lima nung yimsüsüpa menden kaji tashi temetet alipa kisüng agia bener moteter, mesüra ano tashi tulu alipa nisung kati tashiyim amshia nüburtem madak yimsü asütsüba mapang talangkabosa bener motetsüsa akümer. Kechiba ta süra, tanü putu mapang nung tekulok shisatsü peria aliba lanurtem aika soteter, anungji item amala lanurtem rongnung kati mesüra kari iba yimsüsüpa mendenji melena bener otet nungbo nüburtem asoshi anisüngzük tulu angutsü ta bilema aliba ka bener otet nungbo nüburtem asoshi anisüngzük tulu angutsü ta bilema aliba ka lemsateper. Tanü lima tesem kar nungbo nüburtem tia mekara yimsüsür tamajung kar adoker, aser nüburtem madak khen agi taochi mekai yimsü asüba ajanga par nüburtemji telongi ludaktsür. Anungjiang temeshi laishiba Aojjemtsü shin tapu 29:2 nungji yamai shia angur, temeshipur arendang nüburtem pealateper, saka temenen nisungi yimsü asü dangbo nüburtem asüktemer. Tetezü, temeim aliba nisung kari yimsü asü dangbo nüburtem ajak tiptema pelatepa liteper, saka mashikushi kulok shisatsü atenba nisung kari yimsü asü dangbo nüburtem tebang agi ashitsü mekoki timtemdaksür ta ashiba angur. Saka ibala ama yimsüsübajibo mapang memenui tashi tait lennir kar adoka atsüngdoker, tetezü "coup" süa atemer, aser item jagi yimsü asütsüsa akümer. Iba ama tashiyim agi yimsü asüba limaji talisa muslim lima amala nung aiben atalokba angashir.

Tanü asen lima nung ibala mesükba yimsüsübajibo ataloka mangur aser mangashir, saka telong nunbo tsünü-i san küp sümer nüburtem madak yimsüsüba maparenji atalokyonga aoba asenoki ngua arudagi. Iba ama atalokba ajanga tanü asen nüburtem tesünep nung liyonga aoba mangur, yamaji tanü tensa mapang nung kibong kar nungbo kinünger ajak atajema Govt. mapa nung itetba angudang aikati süngmanga repringer. Kechiba ta süra, kibong kar nungibo interview nung aiben agüja merangdangyongbo kenü tanga takok mengutetba aika ngua arudagi. Iba ama tensa mapang ka nungji karibo ashir, tanü asüng interview agütsüba ya pei tia dak tang tuluka keta lir ta jembiba angashia arudagi, aji oda pei tia jagi interview nungji mela mela takok ngutetsüsa kar ket nungbo jabi "key" tajung yua lir ta aikati angateter. Saka taoba mapang nung interview nung atener kari ashir, tang taoba interview mapang nung tu ni melanzütetba questionbo kata maliasü ta ashir, saka result adokdangbo kü tenüngbo takoker rongnung densema mali asü ta ashiba angashia arudagi. Yamaji tamakok angurtem tu tekulok mechiraba agi takok mangu tabo shingai meshitetsü, kechiba ta süra, item candidates-tem tu university tajung nungi degree tajung nung takok ngutetba purtem tang lir. Aser ano yangi asenoki angatetsüsa olen ka shisemer, tanü tensa mapang nung kibong kar nungibo Govt. mapa nung pei chirnurtem aika iteta jangratema aliba angur, parnok ya ita sen kisüng agibo yamai mola moshia melitetsü ta bilemer, kechiba ta süra parnok kibongtem ya parnok itasen agi ita piyong chir kelena, pei kidang mini, kanja tem nem ita sen agütsür tanüngba nungi gari tajung ana asem tashi aliteter, aser külen kimong tasen pezü, pengu tashi aliteta yua kar, iba denji pei kidang kilong nung chiyungtsü chir mechima yua lir, aser ano kidangji repringtangra parnok makatsü kecha maka, iba denji parnok chirtem school aser college tajungtiba nung züngdaksüba angur. Idangji nüburtemi ashir, tsa maa! Parnok kibongtembo Tsüngremia yamai moatsür no ta nükhia repringer. Saka tanüngba nüburtembo anarongtena takar mapa nung hajira aoba agi tang chibo anbo tongtak manener ta litepdage. Aser ano khen mapang kabo tanü amai corona virus tashidak agi nisungtem aika shirangtepdangbo hajera aodaka maka kanga timtemdaki.

Tanü mapang ya aikati Govt. development indang jembir saka iba development ya pa sasabo marur, saka nisung kar ajanga Govt. nungiang sanction bener arur, aser tesem kar nung lemangtem yanglutsür, tesem kar nung ki tajung yanglutsür, iba dakji alaka ano Govt. department kar nungbo stafftem aika mapa nung anioker, item ajakji nüburtem rongnung tulurtemi meteta aliba nisung kar ajanga inyaker. Item amala lenla meteta aliba nisungtemji minister, MLA. Engineer, director, comissioner, secretary, deput commissioner ajaki kanga junga meteta aliba nisungtemiang inyaker asünungji, parnok anemaji shingai ola kata matokteter. Saka ni amala kecha memetetba nisung aikasa ali nungji, item purtem jagi alima nung development tasen aika aruba indangji osang kaketter nung tang asngishir aser angur, saka parnok ketibo jagn seret ka mesüra metai "sweet" tejang ka alitsüba sünga maruba ataloka odagi. Iba jagi nüburtem tsüngdaji anüng o ali na ama litepdagi, iba ama nüburtem tsüngda nung kala kashi "partiality" aliba ajanga alimaji kodanga sünepa longjema meliteter ta nüburtemi metetsüla. Aji oda karbo alima ajongaji parnok meyong ama kümer alitang, kar kanga timtema alirtemi khen mapang ka sen-o-tsü tera ka aputsü asüngdangra parnokjiang koda masüba tia ka nung aliba ama sayur, tetezü senpur jagi meyipa magütsütetsü tsübur sülapa ta bilemer. Saka tajungsang Tsüngremi item ajakji meteta ali nungji aoksa ka taka tait sanger kibongn ungi kinungtsü mesüra par tanur ka timtem tulu ataloka tesem talangkati süngmeni "treatment"-i aotsüsa mapangi bener arutsür, taba mapang ka sensaker kari timtemba ajanga sen-o-tsü tera ka aputsü asüngdang nung ozü-a kanga timtemer ta langzuba tu, tangibo joko sen-o-tsü tu meintok majung lakhs ishikabosa indoktsüsa akümba angur ta nüburtemi jembir, koda tesasatsü mapangi bentsür arutsür.

(Maneni asüng adok nung...)

- Yimozülur dangi -

Osang kaketter nung Naga kintemi Naga Council Dimapur (NCD) dak sendakba court nung ken o tatempang kati bener arutsü asoshi Ao Senso Telongjem Dimapur (ASTD)-i tiyongtsü-i yia inyakba aser Memorandum of Understanding (Mou) tongti süa renemtsüba atema pelaba osang lemsatepba ngua ASTD tenüng asanger. Saka ano iba MoU nung ajemdaker item lokti aser Naga kintemisa ken o ka ashishir ama zülua angudang; ya kodaser item Naga kintem yagi asen ASTD dang ashishitsüsa inyaktet ta ratar. Anungji iba ken o yabo asen Aoer ajunga dang jangjashitsü nung ajungtsü ta bilema iba sabang ajanga kü tebilemba ka lemsateper.

(M. Rongsen)
24/7/21
Nokpu

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

China ketdangsertemi Zoom ajanga tekülem sentong agiba nokdang



Chinese Communist Party (CCP) ketdangsertem aser police-i Shenzhen Trinity Gospel Harvest Church mita aoba mapang tangokba noksa nung angur.

July 25, 2021: Tawa China nung Khristantem Khristantem zoom ajanga tekülem sentong tagidak mapang nung Chinese Communist Party (CCP) ketdangsertemi timtem agütsü, ta International Christian Concern (ICC)-i metetdaksü.

July 11, 2021 anepdang China kübok Guangdong

Province nung CCP security agents aser police ketdangsertemi Shenzhen nung aliba Shenzhen Trinity Gospel Harvest Church mita ao; iba mapang nungji Pastor Mao Zhibin aser putir Chu Yanqing na leniba nung zoom ajanga tekülem sentong agia liasü.

Ketdangsertemi Tenla kiji

longbang aser pastor sayutsüni tesüdak anendakja liasü.

ChinaAid osang ajanga ashiba agi, Pastor Mao aser putir Shen Ling nati Early Rain Covenant Church Pastor Wang Yi sangdong ka agütsüba pusemba mapang nungi tenzüka CCP-i Pastor Mao-i aniba Arogo anema inyak tenzüko.

Uttarakhand nung police-i Pastor ka reshikangshiba sülen mindok

New Delhi, July 25 (Agencies): Uttarakhand state nung police-i pastor ka reshikangshiba sülen yimdak nungi mindokba; iba sülen pastor kibong yimdak nungi mile 600 shi jena ogo.

June 13 nü Haridwar District kübok Shyampur nung police-i pastor Sanjay Kumar Bharati, pa kinüngtsü aser tanurtem den par Arogo züngsem aika apuba sülen police-i pastor, Bharti kanga reshikangshia liasü; Khristantemi coronavirus wara anema tenokdangba anema inyakogo, ta parnok nem tai tonglokja liasü.

Osangbener den jembidang Pastor Bharti-i, pa Shyampur police station atongba sülen police pa dang asüngdangya tesüdak mapang nung pa dak maneni azük, ta ashi.

"Ni police station telungi anir aiba sülen police kati kü dak asemen ama aser tebok nung tsüngokja liasü. Pai kü dang o tamajung aika ashi aser ni Hindu nunger Khristan yimsü dangi meyipdaksür ta tai tongloksü," ta pastor-i ashi.

"Iba sülen parnoki ni takdang telungbai anir aiba sülen yipten ka nung mejangdaksü aser police kati pa nangri agizüker kü tetsüng aser temebo nung azük. Parnoki ni minute 30-40 shi reshikangshia liasü. Ni parnok dang kü dang taochi sayuang ta ashi," ta paisa metetdaksü.

"Police ketdangseri kü dang, Hindu nunger yimsü melendaksütsü atema nai parnok nem sen kwi agütsür? Na sen kechi nungi angur? Shirnoki na yarir? ta

asüngdanga liasü," ta pai ashi. "Item tasüngdangba langzua ni ozü kibong para ki nung alir, aser ni sen tangulen ali nungbo ozü kibong yamai sensak tia nung melila ta ashi. Nisungtemi parnok kidangi ni jaoka ni parnok atema sarasademtsür. Ni anema jembiba otemji tiyazü ta ni parnok dang ashi," ta paisa shisem.

"Anogo ishika kü temang kanga ayang-ashia liasü aser kü tejak den tetsüng kanga awak. Kü tenarong nungi azü ayim aser ni junga mangashii liasü," ta pai ashi.

"Police-i kü dang, Hindu nunger temeshi aini aoertem atema Haridwar ya tongtibang tesem ka lir, süra nai kechiba iba tesem nung Khristan yimsü proker? ta asüngdanga liasü," ta pai ashi.

Police-i pa chiocka mapang nung yimsüng tokjang ta tuyu aser pa anema kari danga ken o agütsüra pa tepuokdak ayutsü, ta amokmerena liasü.

June 13 nü anüngdang 11:00 ako meta pastor leniba nung Khristan 30 shi sarasadem agiba mapang nung police asem den osangbener ka densema aruba sülen pastor apu, aser house church nungjagi Laishiba den Khristan kaketterem aika apu.

Pastor Bharti atema tesayur Rev. Babu Samuel-i, pastor reshikangshiba ajanga ni kanga mepelar, ta metetdaksü.

Babu Samuel-i, "Police-i Sanjay kinüngtsü aser tanurtem-a apu. Sanjay-i mepishiba sülen ang kinüngtsü aser tanurtembo chioka liasü," ta metetdaksü.

Anogo ishika lir Pastor Bharati'er medemer, pastor

S.B. Sahi Dehradun nungi aruba sülen Shyampur police station-i oa police ketdangsertem ajurua liasü.

Pastor Sahi-i ashiba agi, "Ni police ketdangsertem ajurua parnoki pastor Sanjay reshikangshiba indang metetpela, saka parnoki Sanjay dak mazük ta ashi."

Khristan lenirtemi pastor aser par kibong kümzüka alitsü atema talangka jena oadokang ta shia tesem ka tuyua liasü.

Pastor Bharati-i police-i pa dak azükba kuli sayutsü atema sorkar hospital ka nung medical check up agia liasü. Hospital ketdangsertemi tamasabo local police station dang nungi temelaba magii medical test agütsütsü memelung, saka pastor Pastor Sahi-i phone ajanga District Superintendent of Police den jembiba sülen medical test agiogo.

June 15 nü Pastor Bharati den Arogo züngsem pezüi Haridwar nung DSP ajurua police-i pa reshikangshiba indang ken o ka agütsü. Kobi melii ki kibur-i pastor kidang nungi mindok, iba sülen yimdak shingai Pastor Bharati nem para ki agütsütsü memelung.

Bharati-i, "Nisung ajaki police aser kü tamangba yimsü anema inyakertem tsübur," ta ashi.

Mapang ka nungbo par Arogo nung züngsem 150 tashi liasü, ajisüaka yimdaklirtemi Khristantem anema inyakba ajanga tangbo züngsem 50 shi dang kümogo, ta pai ashi.

July 6 nü Pastor Bharati aser par kibongi Shyampur yim toktsür apuso aser tang mile 650 shi pilar tesem tasen ka nung lidar.

ANOGO ABEN TSÜNGREM DEN

Pei Dang Nungi Pi Taoba

"Saka ajemaluba shisatsü agi nisung shiai pei dang nungibo taoba ta züngshiangma. (Phil. 2:3)

Asenoki nisung kar pei-i bilembaji dang shitak ta bilemba angur. Item daangji tekong temerang ta ajatsü akok. Ochi nungi mainshi taküma dena tenla-a nokdakbaji balaka, saka pur medemer den lokti nung tangar o au tamagizüki pei bilembaji dang shitak ta nokdakba taküm jagi lokti sendenji menentsür. Talisa lenisüba nung iba amala tangatetba alir jagi pei pur kübok meiteter.

Kechiba tekong meranger? Mezüng kuli kaji ajemaluba mali. Ajemalur ka jagi asenji tama masür, saka tangar tebilemba, tangar o, aser tangar nem mezüng yimli agütsür. Ajemalu tanela jagi tangar shisatsü aser tebilembatem agizükteter, aser mapa kümetsüba nunga nungita yarir. Tanabuba nung asüküm tanela. Asüküm tanela alirji teti tekong temerang. Telung shisatsü nung asüküm alir jagi pi inyakba nunga manitaker aser magizükteter. Tasembuba nung, khrista jakla nung anünga aliba. yisu khrista dak teti tangar asoshi bilemetsüba tanela liasü. Pa alimai aruba nükjidongjia pa asoshi masü saka asenok atema aru.

Temeimbatem, Pauli ashiba ama ajemaluba shisatsü agi pei dang nungi pi taoba ta bilema tenzüktepra aji agi memeteti asen-ang ajangzüker.

SARASADEM:

Temeim Oba naia koda ni atema na taküm tenla yamaji nia pei dang nungi pi taoba ta züngshitsü ne tanela agi maneni jembidakjangma. Amen

TO,

THE CONVENOR,
SESQUICENTENNIAL PLANNING COMMITTEE
ABAM, IMPUR.

SUBJECT - Agenda pangzüng bendanger.

1. IMPUR HOSPITAL, Naga lima nung mezüngbuba Dr James R. Bailey America lima nungi Medical Missionary 1909 küm nungi impur lima nung mapa inyaka tenzüker, 1912 mezüngbuba dispensary lapok. Tesulen 1955 küm 30 bedded hospital tenzüka 2012 küm Centenary among. Saka tanu tashi nupur yaritetsüsa facilities peria mali, Anungji arogopur / lokti tentet ajaki shilem agia tajungtiba küma yanglushitsü pangzüng renemtsü aser iba hospital nungja Dr JAMES R. BAILEY MISSION HOSPITAL ajatsü.
2. SCHOOL. Mrs. Mary Mead Clark ajanga Naga lima nung mezüngbuba kaketrjuju lapokbaji Molungyimsen yimdak 1878 aser tanabubaji impur 1895 nung lapoka Clark Memorial higher Secondary school-ji mezüngpurtem naga lima impur nung amenoka lir, iba school ya ABAM home mission kupok aja-ayanger, anungji dang tang nungi tajungba/ terenlokba aotsü asoshi Mongdang ketdangsurtemi anir arogopur / lokti tentet ajaki sentong takok ngua aotsü pangzüng renemtsü.
3. TULI ABAM FARM, YI ASER MOZÜLAR asoshi rehabilitation cum vocational training lapoktsü aser parnok taküm kipong ajak tanula tekümet ngudaksütsü asoshi Sannükertemi anir pei arogo nung tongti shilem agütsü aser tanu lanurtem asoshi tensa den apet küm shia ABAM ajanga sentong aja ayangtsü pangzüng renemtsü.
4. Missionary merijang ter (10000) yoktsü asoshi Tsüngrem den tanaben tezüngzüktep yanglutsü, Arogotem (Home Mission) nung tanu lanurtem shisaluyim palala nung timtem mokokminer yaritsü aser arogo tului arogo tila yaritsü pangzüng renemtsü.
5. SESQUICENTENNIAL amongba tenung nung home mission nung tenzükertemi anir arogopur ajak tanular nutsüng ka tanga mesamai anitetsü aser kangki kupok taküm bendanga aguja tenzüksü TEBU TECHIR TANULA temeshi tenung nung nangzüktsü.

(BENDANG IMSONG)
SOCIAL ACTIVIST MKG.
Contact no. 8787522684

OLONG PAITEP # 5886

1				2				3		4
5		6								
							7			
8										
										9
		10					11			
				12				13		
14										
							15			
16										

TIPIEN		LANGTSÜNGLEN	
2. Auo nung chiyongsü asenba	- (7)	1. Lenmang	- (7)
5. Mangyimba mapang	- (5)	2. Aor kidong ka tenüng	- (6)
7. O tamendakdak	- (4)	3. Tenarong maten	- (6)
8. Pei dak malangba	- (7)	4. A _ _ _ g	- (3)
10. Juli	- (7)	6. Mopung apodoka	- (3)
12. Sen ayudak	- (7)	ola adokdaksüba	- (3)
14. Tenük agi ajitet	- (4)	9. Tongtipang tagitsü	- (7)
15. Tamajung aküm	- (5)	10. Menungra bilem	- (6)
16. Apuso	- (7)	11. Aiür	- (6)
		13. S _ _ _ k	- (3)
		14. T _ _ _ r	- (3)

OLONG PAITEP # 5885 TELANGZÜBA

TIPIEN :		LANGTSÜNGLEN :	
1. Yiar, 3. Tesola, 7. Yimra,		1. Yimti, 2. Amen, 4. Shiner, 5. Alaka,	
8. Tangar, 9. Peria, 10. Tanur,		6. Satan, 9. Putet, 10. Tembar,	
11. Tasen, 13. Lemjem, 15. Tambu,		11. Tatok, 12. Amang, 14. Jala.	
16. Khuret, 17. Sang.			



KIDANG KILIR AYUBA TAKOKSA KAR

Sobang : Kapu...Asenok kidang kilir ayunung tajungba asü mayunung tajungba amai nai-a bilemer...???

Alokba : Ena Kapu...Ni ashitsübo kidang kilir ya mayuba-ang kanga agi tajungba... Kechiyong asen jabaso-jalatem jenjang kanga raksadaksür adi.

Sobang : Kapu...Surabang kidang kilir ayuba agi jabaso-jala jenjang raksadaksüba külittemji kar rasa-a ashitsü asü...???

Alokba : Ena... Kilir ayuba agi asen jabaso-jala raksatsübaji.... Parnoki sorochoiktsü mashir...Suoshi shitoktsü mashir.... Ki oka meruktsü mashir....Kilir ayuba agi asen jala-jabasotem azümesen kümdaksür... Ano kanga tamajung kaji asen kidang kilir sorobangro tamajung ayuba....Iba soroji mesuka asen jala jabaso sotetba kibong karbo lir-kodi...Anungji kokrabang kilir ya mayuang tajungba aja...Kilir kanga mejungi ayuba taa...Pei jabaso-jala tangar kidang kilia senzütsüsa tia bentsür aruba kibong karbo lir-ko-di.

~ Lilir : L. Kika Pongener.

AO OSHI ANGAZÜKDAK:

TANÜ ANGAZÜKTSÜBA OJANG



Kilung

(n) ki telunglen (interior of a house)

* Tanü asüng nisung ajaki ki **kilung** kanga topur junga yanglur.

Kima

(n) ki jakdang, yimdong nung (courtyard, outside of a house)

* Ki asüdang **kima** sadema adoktsüsa yanglutsüla.

NAI-A YA METETTER MA?

Indian Olympic Association (IOA)-i Tokyo Olympics nung shilem agir National Sports Federations (NSFs) shia nem senpet sen lakh 25 (25 lacs each) talila agütsüba dak alaka, iba asayamung nung gold medal takok angur athlete nem senpet sen lakh 75 agütsütsü sangdongogo. Iba den külemi, silver medal aser bronze medal takok angur athlete nem senpet sen lakh 40 aser lakh 25 agütsütsü. Takok angur athlete tem dak alaka, Games nung medal takok angur National Sports Federations (NSFs) shia nem senpet sen lakh 30 (30 lacs each) agütsütsü. Ano Tokyo Olympics nung shilem agir NSF züngsem tanga nema sen lakh 15 aser India tenüng nungi shilem agir athlete shia nem senpet sen lakh ka ka agütsütsü IOA Advisory Committee-i lemtetogo.



TANÜBO NAI LANGZÜANG

Q. Koba küm Nammi Ganga programme tenzük?

- A. 2012 B. 2014 C. 2016 D. 2018

===== (Taruba adok nung onoki langzüsü)

YASHI ADOK TELANGZÜBA : BSNL

SUDOKU # 5926

TELANGZUBA # 5925

	8	3			2				3	9	5	4	2	6	7	8	1
		9	4			6			8	4	7	9	1	5	3	6	2
5			9			3			2	1	6	3	7	8	5	9	4
1			8			3	2		5	2	3	1	4	9	6	7	8
6		2		3	4				7	6	1	2	8	3	4	5	9
4			5	2			6	7	9	8	4	5	6	7	2	1	3
3	7	1	2						1	5	8	7	3	4	9	2	6
9	2					7		4	4	7	2	6	9	1	8	3	5
8			1	6					6	3	9	8	5	2	1	4	7

OJANG LUTEP # 5471

NNLEIR	:	<input type="text"/>
NGTAJUI	:	<input type="text"/>
TKDAEJANG	:	<input type="text"/>
BAALI	:	<input type="text"/>
DANWAG	:	<input type="text"/>
MAATE	:	<input type="text"/>
KÜTAM	:	<input type="text"/>
GANDBEAN	:	<input type="text"/>
ÜTSAGÜR	:	<input type="text"/>
AKEINYR	:	<input type="text"/>

OJANG LUTEP TELANGZÜBA # 5470

MAPA TAJUNG INYAKER SENSAMASAJA ASER ATALATSÜBAJI KANGKI LAODAKTSÜBA DEN SAKU

TAN HOPTA ATEMA - KOMA SÜLA ?

Q. Nagaland nung Covid vaccination ya nisungtem teimba ka dak magii anen nunga koma süla ?

Maharashtra nung NDRF-i tasü mang 72 nguogo; nisung 47 sama



July 25, 2021 nü Maharashtra kübok Ratnagiri district nung anentsüh aluba tesem ka nungi NDRF zü ngsemtemi tasü mang agitetba noksa nung angur.

Mumbai, Chiteni/July 25 (Agencies): Maharashtra nung tesüiba anogo ishika tzü nglu kanga aruba sü len Honibarnü sü ngjemogo, ajisü aka tang tashi nung anentsüh aluba tesemtem nungi security forces-i tasü mang 73 nguogo aser nisung 47 bo samar tang tashi mangur, ta Amongnü National Disaster Response Force (NDRF)-i metetdaksü.

Ketdangsertemi ashiba agi, Honibar aonung Ambeghar yim dak anentsüh aluba sü len tasü mang 11 agitet, Mirgaon yim dak anentsüh lendong aluba tesem nungi tasü mang trok agitet aser Dhokawale yim dak anentsüh aluba tesem nungi tasü mang pezü agitet.

Brihostibarnü Raigad district kübok Taliye yim dak anentsüh

lendong atalokba sü len tasü mang ajak senteper 41 agitetogo, ano nisung aika samar mangur, ta Amongnü anepdang Deputy Inspector General of Police (Konkan), Sanjay Mohite-i metetdaksü.

State nung tzü metsü ng aliba tesem balala nung NDRF teams aser Army temi kü mzü kba maparen inyakdar.

Director General (DG), S N Pradhan-i, Raigad, Ratnagiri aser Satara district tem nung kü mzü kba maparen inyakba osang tejangja twitter ajanga metetdaksü.

NDRF sepaitemi state nung anentsüh lendong atalokba tesem balala nungi tasü mang 73 ngutetogo aser asürtem timtibaji Raigad kübok Taliye yim dak nungi lir. Item district asem nung nisung 47 bo samar

tang tashi mangur, ta Honibar ayaterm nung ketdangsertemi metetdaksü.

State sorkari ashiba agi, tzü nglu maneni aruba ajanga Maharashtra kübok Pune aser Konkan divisions nung tesem 112 tashi nung anentsüh alu aser timtibaji Raigad nung (52) liasü.

Tang tashi nung nisung 1,35,313 ainshidaksü ogo aser timtibaji Sangli district nungi nisung 78,111 aser Kolhapur district nungi nisung 40,882 ainshidaksü.

Sangli aser Panchganga nung Krishna ayong nung tzü kanga metsü nga yimdar; Rajaram nung Panchganga ayong nungbo tzü kanga sü ngjemogo saka sü klep 43 tali mobanga yimdar, ta Amongnü district disaster cell-i metetdaksü.

Gujarat nung tang mezü ng Kappa Coronavirus variant putet

New Delhi, July 25 (Agencies): India nung coronavirus wave tasembuba tenzü ktsü, ta aikati tsü butepba mapang nung tang mezü ng Gujarat nung Kappa coronavirus variant putetogo, ta ketdangsertemi metetdaksü.

Gujarat kübok Jamnagar nung nisung asem aser Godhra nung nisung ana dak Kappa variant putetogo, ta state sorkari sangdong ka nung metetdaksü.

Union Health Ministry-i ashiba agi, Kappa variant ya tang tasen masü saka takü m February ita nungi linük nung iba

variant liasü, kechiyong iba variant ya B.1.617 constellation of mutations den sendaktepa lir.

Kappa variant nung mutations 10 dak tema lir aser anabo - E484Q aser L452R lir, ta jangjaogo. Ibaji ajanga Kappa variant dang "double mutant" taka ajar.

Takü m May ita nung World Health Organization (WHO)-i variant tasenba dang ya "Kappa" ta aja. Iba onlong ya Greek ojang nungi agizü kba lir.

Takü m March ita nungi June ita tsü ngda Gujarat nung coronavirus tashidak puteter

nisung pongu indang Genome sequencing of samples ajanga parnok pongu dak Kappa variant aliba jangja, ta state health department-i metetdaksü.

Department-isa shiranger ponguji ajururtem contact trace sü a tendangogo, ajisü aka parnok shinga dak coronavirus meputet.

Tang tashi nung Gujarat nung nisung 8,24,683 dak coronavirus putetogo aser iba nungjagi nisung 8,14,265 anepogo. Tang state nung coronavirus agi teshirangdakpur 342 lir.

India nung ano Covid agi shiranger 535 asü

New Delhi, July 25 (Agencies): India nung ano nisung 39,742 dak coronavirus putet aser iba tashidak agi shiranger 535 sü ogo, ta Amongnü Union health ministry-i metetdaksü.

Tang tashi nung linük nung nisung 3,13,71,901 dak coronavirus putetogo aser iba tashidak agi shiranger 4,20,551 sü ogo.

Tesüiba ghonda 24 tsü ngda coronavirus agi shiranger 39,972 anepogo aser tang teshirangdakpur 4,08,212 dang kü mogo.

Tanü tashi nung vaccine dose crore 43.31 agü tsü ogo, ta health ministry-i metetdaksü. Honibarnü samples

17,18,756 tendanga liasü aser tang tashi nungbo samples ajak senteper 45,62,89,567 tendangogo, ta Amongnü ICMR-i metetdaksü.

Tesüiba ghonda 24 tsü ngda coronavirus agi shiranga asür 535 nungji Maharashtra nung 224 aser Kerala nung nisung 98 asü ba densema lir.

Tang tashi nung linük nung coronavirus agi shiranger ajak senteper 4,20,551 sü ogo aser nisung timba asü ba state temji Maharashtra (1,31,429), Karnataka (36,352), Tamil Nadu (33,889), Delhi (25,041) Uttar Pradesh (22,749) aser West Bengal (18,064) state tem lir.



July 25, 2021 nü Jaipur nung aliba Pradesh Congress Committee Headquarter nung Congress lenir, Ajay Maken, Rajasthan Congress Tir, Govind Singh Dotasra aser party lenir, KC Venugopal nungeri osangbenertem den jembiba noksa nung angur.

PM-i Pegasus dak sendakba sangdong ka agü tsü tsü la: P Chidambaram

New Delhi, Chiteni/July 25 (Agencies): Amongnü Congress Party lenir, P Chidambaram-i, Pegasus ken o bushisü ngdangtsü atema sorkari joint parliamentary committee ka tentetsü la mesü ra iba ken o bushisü ngdangtsü atema Supreme Court dang judge ka shimang ta mepishitsü la, ta metetdaksü.

Chidambaram-isa, Ato kilonser, Narendra Modi-i Parliament nung iba dak sendakba sangdong ka agü tsü tsü la, ta takhangba agü tsü.

UPA sorkar mapang Union Finance Minister, Chidambaram-i, ozü ng alema itangitba ajanga 2019 kü m Lok Sabha election nung BJP-i takok angu, ta ni meshitetsü, ajisü aka ibaji ajanga BJP-i takok anguba nung yarir asü tsü a akok; iba ya ajanga parnok tenü ng menü kogo, ta ashi.

Interview ka nung jembidang Chidambaram-i, iba ken o ya Parliamentary Standing Committee on Information Technology-i bushisü ngdangba dang nungibo Joint parliamentary committee (JPC) kati bushisü ngdangba tajungba asü tsü, kechiyong Parliament-i JPC nem tashi tuluba agü tsü tetetsü, ta metetdaksü.

"Parliamentary committee temzü ngtemji tesashi. Tatishitsü agi, parnoki yimjak nung kuli magitetsü, saka Parliament-i tashi agü tsü ba ajanga JPC-ibo yimjak nung kuli agitettsü, kulisürtem asadangtetsü aser documents meshitetsü. Anungji parliamentary committee dang

nungibo JPC dak tashi tuluba alitsü," ta pai ashi.

Centre sorkar dang pai, Pegasus spyware ajanga nenoki itangiter asü? ta asü ngdang.

"Pegasus spyware ji amshir ka asü nungbo shibai angu? Ibaji sorkar asü mesü ra parnok indang agency kari angu?. Iba spyware alitsü atema sen kwi indokar sorkari ashitsü la," ta Rajya Sabha MP, Chidambaram-isa metetdaksü.

"Item ya kanga tongmelang tasü ngdangbatem lir, aser item tasü ngdangba ya sensotemi asü ngdang, anungji minister-i indang-indanga langzü tsü la. France Tir (Emmanuel) Macron indang phone number-a 'hack' sü ogo ta jangjaba sü len France-ibo bushisü ngdangtsü tuyuogo. Israel-ia parnok indang National Security Council dang bushisü ngdangtsü tuyuogo," ta pai ashi.

Tongtibang linük anati bushisü ngdangtsü tuyura kechiba India-ibo meinyaktetsü, ta pai ashi. "Iba ya linük security atema tongtibang onük ka lir, kechiyong sorkari itangitba mapa meinyak ta shira shirnoki itangit?, ta tasü ngdangba ka arur," ta paisa ashi.

"Itangitba mapa inyaksü sa sorkar agency kar dang lir, aser item agency ajakji Ato kilonser tashi kü bok lir. Minister shia-i pa kü bok aliba department indang ang meteta lir, saka Ato kilonseribo department ajak indang meteta lir, anungji Ato kilonseri telangzü ba agü tsü tsü la," ta paisa shisem.



July 25, 2021 nü Bengaluru nung Lingyat nunger yimsü lenirtemi Karnataka Chief Minister, B S Yediyurappa maneni Chief Minister asü tsü takhangba agü tsü ba noksa nung angur.

Iraq nung US sepai menüngdak: PM al-Kadhimi



Baghdad, Chiteni/July 25

(Agencies): Linük nung joko ISIL (ISIS) den raratsü asoshi America sepaitem menüngdaker, saka tain hopta US ketdangsurtem den jembiba sülen par sepai tanaben yokshitsü maparen metettsü, ta Iraq ato kilonseri ashi.

Osangbener den jembiba mapang Mustafa al-Kadhimi-i ashiba agi, Iraq-i US dang maneni mitkar training aser itdangiter maparen asoshi asüngdangtsü, saka sepaitem ainshitsü atema mapang lemtettsü koba Washington aser Baghdad tsüngta ken o tang tejembidak mapang April ita sangdonga liasü.

"Iraq li nung bendanger sepai menüngdak," ta pa Washington-i aotsü lia ashi, kong pai Hombarnü Tir Joe Biden ajurua linük ana tesendaktep ken o jembitsü lir.

"IS (ISIL) anema raraba aser asen sepai renema alitsü mapang telatet ka nüngdaker, aser ibai Washington nung jembishinüba dak keta lir," ta pai ashi.

Iraq nung US ajanga shilem agiba ajemdaktsütsü atema Shia yimten yimsüsürtemi ajungshiba mapang Al-Kadhimi ya White House semdang alitsü.

Taoba küm Iraq nung US-i drone amshia amakba mapang Iran nung tashi tait general Qassem Soleimani aser Iraq nung militia commander Abu Mahdi al-Muhandis tepsetba sülen Shia nungertemi bendanger sepaitem linük nung ainshitsü ola adok.

Iraq nung Iran den sendaktepa aliba sepai mesük telok balalai US sepaitem alidak amakba tali akumba ajanga al-Kadhimi-i Iraq nung bendanger tashi tait sepaitem madak yimsü

asütsü tashi ajema akumer.

Kasa mapang Iraq nung ISIL tanaben poktetshtitsü tetsübu nung lir, anungji al-Kadhimi-i Baghdad nung bendanger sepai okshiabo meyokner.

"Iraq nung aliba US sepaitem nung onoki training aser terenlok aser tashi, aser security tsütsü amalitep aginer," ta al-Kadhimi-i ashi.

"Iraq nung America nung raradang amshiba hadir jenti lir aser itemji anepalutsü aser amshitsü atema training nüngdaker. Asenoki America nung dang maneni aser sepaitem yaria asen tashi renlokdaktsütsü asüngdangtsü," ta pai ashi.

Taoba küm nung Iraq nung US sepai 2,500 shi lir, koba iba mapang tir inyaka alisang Donald Trump-i sepai tajemba kumdaktsütsü totuyuba agütsüba sülen 3,000 nung ajemba alitsü.

Taoba Tir Barack Obama-i 2011 küm Iraq nung US sepaitem ainshidakja liasü, aser iba yongji security tsütsü tazüng adoka ISIL tashi tuluba akum. US sepaitem 2014 küm tanaben yoka liasü.

US sepaitemi ali nung mission balala inyakba mapang Iraq sepaitem den joko meyariteper, saka parnoki itdangiterba aser advanced military technology tem amshiba nung yariteper, ta US aser teloktep ketdangsurtemi ashir.

Israeli airlines anati Morocco-i tayimtsü yok tenzükogo

Jerusalem Chiteni/July 25

(Agencies): Israeli airlines anati Deobarnü Israel aser Morocco na tsüngda mezüngbuba commercial flights tenzükogo. Linük ana tsüngda tesendaktep mejungi aliba yanglushiba sülen küm ka majung tsüngda iba jenjang agiogo.

Israir indang tayimtsü mezüngbuba ya Tel Aviv nung Marrakech-i Israel nung alima penzür 100 shi merer ao, ta company-i ashi. Iba tayimtsü apusoba sülen ghonda ka shir lir kasa tesemi Israeli national carrier El Al-ia mezüngbuba tayimtsü yoka liasü.

Israeli Tourism Minister Yoel Razvozov-i ashiba agi, Morocco-i tayimtsü indang indanga yokba ajanga tourism, shishilemba aser yimden yimsüsüba dak sendakba nung linük ana tsüngda tesendaktep tajungba akümtsü.

US-i achaayangba "Abraham Accords" dak

ajemdaker 2020 küm tatemlen Israel aser Morocco nati tesendaktep yanglushitsü atema mulungtepa liasü.

United Arab Emirates, Bahrain aser Sudan densema Morocco-ia Israel den diplomatic tesendaktep yanglushiogo.

Tenangzüktepa kübok United States-i, mapang talangka Morocco-i Sahara anüolen tesem kar parnok meyong ta khanga aruba agizütsü mulungtep, ajisüaka Biden administration-i iba telemtetba ya asdangshitsü ta shiogo. Morocco-i 1975 küm Sahara anüolen atsüngba ya United Nations-i magizüker.

Israel nung Jews tem aika Morocco nung jakzükertem lir, kong Jewish nung meyirejang ishikabo lidar.

El Al-i sangdong ka ajanga ashiba agi, parnoki Israel aser Morocco na tsüngda hopta nung tayimtsü pongungu senzüdaktsütsü sentong lir.

Afghan national security adviser den ajurutepeba atema Sharif aitsü

Islamabad, Chiteni/July 25

(Agencies): Imran Khan cabinet nung züngsem aikati Honibarnü Pakistan Muslim League (PML-N) tekolakba aser taoba PM Nawaz Sharif dang taktsü maket jaa aitsüogo. Sharif-i Afghan national security adviser Hamdullah Mohib den ajurutepeba atema pa aitsü aser ashiba agi, iba ajanga Modi densema Pakistan nung tsükchirtem den pa tesendaktep aliba sayur.

Afghanistan indang National Security Council official Twitter handle ajanga Mohib aser minister for peace Sayed Sadat Naderi na Sharif den taoba Brehostibarnü ajurutepeba noksa lemsatepogo aser iba ajanga Pakistan nung nüburtem aikati ola adokogo. Taoba Pakistan PM den ajurutepeba ya arok ken o kar sensak asemtsü atema liasü, ta ashi.

Iba sülen mapang tatsüka lir senden indang noksa ka (screenshot) den hashtags #NawazSharif & #AfghanNSA ya Twitter nung lemsatepyonga ao.

Pakistan information minister Fawad Chaudhry-i, "Iba amala atalokba ajanga Nawaz Sharif bendangleni yokba ya lendong lir.. kechiyong iba amala nisung ya international ploys nung shilem ka akümer," ta ashi. "Afghanistan nung RAW tembar tongtiba den Sharif ajurutepeba ya ibala mesükba tatishitsü ka lir," ta pai ashi.

"Modi, Mohib mesera

Amrullah Saleh (Afghan vice-president).. Pakistan nung tsükchir ajak ya Nawaz Sharif den kanga junga sendaktepa lir," ta Chaudhry-i tweet asü.

Human rights minister Shireen Mazari-i, arok ken o kechi sensak asem iba indang metetnüa ashishi. "Mohib-i, PTI sorkar masü saka Pakistan ya "brothel" ka ta ajaba sülen RAW tejangrabaji Pakistan amaktsüba dang asütsü. Rongsen ayua yau aliba kümzüka ayutsü atema Sharif inyakyim ya taktsü mapa ka," ta lai ashi.

Science and technology minister Shibli Faraz-i iba senden ya inyakyim tasen ka masü ta ashiba den (steel tycoon Sajjan) Jindal mesera Modi süang Sharif-i Pakistan nung tsükchirtem den tesendaktep yua aruogo, ta ashi.

Taitsüba balala dak sendakba nung telangzüba agüja Sharif'er jalar Maryam Nawaz-i, tebu tebilemba tamendakdakji kidanger linüktem den Pakistan yimjung nung liyonga aotsü atema lir aser iba atema pai anibelem mesasai inyaka aruogo, ta ashi.

Afghan national security adviser-i, Afghanistan nung Taliban nem teyari agütsüba atema Pakistan aser ISI aija aruogo, koba Islamabad-i magizüker.

May ita Nangarhar province nung o jembiba mapang Mohib-i, Pakistan ya Heera Mandi, Lahore indang red light tesem den medemdanga jembi.

China anüdoklen yipru tesashi agi kongshia lir



Zhoushan, Chiteni/July 25

(Agencies): China nung tzümetsüng tesashi adoka linük tesem kar nung kanga mejungi kongshir anogo ishika sülen ano typhoon tuluka agi linük anüdoklen kongshia lir.

Typhoon In-Fa, koba dang China nungeri Yanhua ta ajar, iba yipru tesashi yagi Zhoushan yimti nung anüngdang 12:30 ako (par mapang) nung kongshi, ta osang ajanga ashir.

Transport ajak shibanga lir aser nüburtem dang kilung nung alitsü totuyuba agütsüogo.

Süngdong-lidong tera dena mükeptet aser tesem kar nung tzümetsüng adok. Shanghai south tsütsü kanga mazüngi aliba rongnendak tesem nung rong ter dak tema azüngtettsü.

Ajisüaka tang tashibo ki-o-jen kanga mejungi raksatsüba osang mali.

Central China nung tzümetsüng tesashi adoka ki-o-jen aika raksatsüba den nisung 58 takum samatsüba sülen iba typhoon ya arur.

Tzümetsüng agi timtem agüja aliba nisung million aika nem emergency crew temi tang tashi ammag sangwa metitemi teyari agütsüba mapang lir.

Anogo ishika tsüngta typhoon In-Fa yagi ano tzünglu tesashi arudaktsütsü akok aser ibaji ajanga teyari aser terenlok maparen nung tetsükdaktsü agütsütsü, ta ketdangsurtemi tsüba bilemer.

Iba typhoon nung mopung ya ghonda ka nung kilometer 137

tashi kera aoner, ta ashir.

Iba yipru ya anüolen tsütsüü oa Hangzhou yimti nung kongshitsü akok, ta Japan indang Meteorological Agency ajanga asadangteta lir.

Deobarnü nung tenzüka typhoon yagi mapang talangka tzünglu kanga sashia arudaktsütsü, ta China indang National Meteorological Center ajanga ashi.

Tzükumlen mopung, tzünglu aser tzüsem mita alitsüla, ta ashi. Zhejiang province nung ketdangsurtemi school, shishilempadak tesem aser business tem shibangtsü totuyuba agütsüogo.

China indang yimti tulutiba, Shanghai nung public park aser museum kar shibangogo.



HEALTH NURSING SCHOOL

Singrijan, Dimapur
Recognized By Indian Nursing Council,
Affiliated to Nagaland Nursing Council, Approved by Govt. of Nagaland



ADMISSION OPEN FOR

1. GENERAL NURSING & MIDWIFERY (GNM)
2. AUXILIARY NURSES & MIDWIVES (ANM)

Forms and application forms can be obtained from the office during office hour

For more information you can visit our website: www.healthnursingschool.in
Or email us at: healthnursingschooldmv@gmail.com

Contact No. +919366938995, +919856583312, +919774043387

OFFICE OF THE
DIMAPUR YAONGYIMSEN LONGKÜM
SAYIR ELANGTSÜR TELONGJEM
DIMAPUR, NAGALAND.

TENÜNGSANG AGÜTSÜR



Dimapur Yaongyimsen Longküm Sayir Elangtsürtemi sarasadema aser yongyaa ataba asangsang nung ataloka, Mr & Mrs. Yashimeren Longkumer'er jala **Kr. Chubalemla Longkumer-i** Nagaland University kübok " Impact of Illegal Immigrants in Nagaland" onük nung thesis tabensa züluteta Doctor of Philosophy (Ph.D) jenjang ngutetba takok asoshi la nem Yaongyimsen Longküm Sayir Dimapur aser yimti nung alir kidongpur aser Elangtsür ajaki

tenüngsang tulu agütsür.

Tarutsü anogotem nunga nü taküm wadang ajak nung maneni Tsüngremi takok nung aniang ta sarasadema moatsür.

Sd/-
(MRS. AOSANGLA LKR)
F/Secretary.

Sd/-
(MRS. MAYANGLA LKR)
General Secretary.

Akuluto nung Covid-19 awareness sentong ka ayongzük



Zunheboto, Chiteni/July 25, 2021: Dr. J. Hokugha Sema-i telok den jembiba mapang tangokba noksa ka yangi angur.

Zunheboto, Chiteni/July 25, 2021 (TYO): Deobarnü, Akuluto town, Zunheboto nung Covid-19 Vaccination dak sendakba nung sensitization cum awareness sentong agiba mapang, DVBO, NVBDCP, Zunheboto, Dr. J. Hokugha Sema-i sentong nung adenertem dang vaccination drive campaign nung shilem agitsü asoshi ajungshia liasü, ta sangdong ka ajanga metetdaksü.

Iba wara aliba/adokba ajanga tsübuseta melii tali kümdangshia alitsü asoshi mera tapet agitsüla, ajasünungang asenok iba tesashi wara nungi kümzüka alitsü akok, ta pai metetdaksü.

Dr. Hokugha-i, tashidak tsüngsü bushiba, iba wara lendongbang aser lokti nung iba tashidak alirtem bendanga

mamshitsü indang onüktem nung ajemdaker telok den jembigo. Tangba mapang, kati kati yaritepa alitsüji kanga dang tongtibang aser iba wara anema raratsü asoshi ajaki khuret bena shilem agitsüla, ta pai ayongzük.

Covid vaccine dak sendakba nung, pai sentong nung adener ajak dang atsüayonga melii iba ya maongka tajung ka ama agitsü asoshi mepishia liasü. Iba den külemi, social media sabang ajanga olulu/tiyazü osangtem prokba nung mamangtsüla aser akok tashi takaratiba nung vaccine agitsü asoshi pai telok ajungmeso.

Pai, Covishield vaccine dose agütsüba yimyattem indang telok dang rasa ashi aser pei dang masü, saka kibong nung

adianutem aser kiyonger tem iba wara nungi kümzüka yutsütsü asoshi vaccine agitsüla ta ayongzük.

Dr. Hokugha-isa, Zunheboto nung Covid-19 vaccine mezüng aser tanabuba dose agir alir healthcare worker tem aser iba district kübok temsüa alir noklang shilem ayimjema vaccine agütsüba yimtsüng tem indang osang tejangja telok dang metetdaksüogo.

Maneni, iba sentong temer sülen, shilem agir aser shisalen sayur tem den sensaksem mapang liasü.

Iba Sensitization sentong nung, medical staffs, GB's, Council members, School Headmasters aser Kaketshir lennirtem aruagi denogo, ta kasa sangdong nung shia lir.

Tripura nung CPI-M-i BJP sorkar aitsür

Agartala, July 25, 2021 (Agencies): Tripura nung BJP-i aniba sorkari COVID-19 wara mapang nübortem atema meinyaker ta Left Front-i aitsüogo.

Tripura sorkari wara mapang sensakertem atema mapa shitak meinyaker, ta opposition CPI-M-i tai tongloktsü.

"Yaküm nungi wara adokba

sülen CPI-M-i state sorkar dang jang seret 10 aser pulses agütsütsü shia arur. Onokisa yimtsüngtem nung aser urban areas nung TUEP tesemtem nung MGNREGA kübok Rs 7,500 teyari agütsütsü ashir, saka opposition party-i ashiba sorkari magizüker" ta CPI-M State Secretary, Gautam Das-i ashi.

"Covid wara tanabuba

adokba sülen May 14 nungi curfew tenzük. Nisungtemi Rs 1000 aser jangotsü khen agütsüba ajanga kobika litettsü? Tripura nung kibong lakh 7 nungi kibong kwi kati iba teyariji angu'ar meshiteter" ta Das-isa ashi.

Tripura nung BJP sorkarisa COVID-19 wara atema mapa shitak meinyaker, ta CPI-M-isa aitsü.

OFFICE OF THE
**MERANGKONG YADEN-
UNGER KIDONG TELONGJEM**
P.O. Tuli - 798618
Dist: Mokochung, Nagaland.

TENÜNGSANG ASER TETUSHI AGÜTSÜR

Wb. Temjenzulu Yaden aser Wt. Chubasenla Imsongtsür dena jala **Kr. Sentienla Yaden**. 2021 H.S. L.C tatitang nung lai Top 11 (Eleven) jenjang tongteta yimer aser kidong nem tenüngsang bener arutsüba asoshi, Merangkong Yaden-Unger Kidong-i tenüngsang aser tetushi agütsür. Tsüngremi tarutsü nunga jala jenjang tajung takokba nung moaja aniang ta kidongi sarasadema atar.

Sd/-
Wb. T. Manen Yaden
President
Merangkong Yaden Unger
Kidong Telongjem

Sd/-
Wb. Akünnungsang
Gen. Secretary
Merangkong Yaden Unger
Kidong Telongjem

Asüko Lemsateper

Aor Linük Tenzüker Telongjem, NSCN/GPRN ajanga asür lenir wabong Lt. Bendangmayang Jamir Longkhum yimtiba nungi, pa taküm, 23rd July 2021 anogo iba lima nungi pila-a aoba osang angashia asür kibong aser kinunger dem ajak den iba asüko lemsateper.

Ao Senden aser Naga Hoho nung pa lenisüba mapang aser pa taküm ali-tepiyong Naga yimten temeten asoshi tasü-ita aser ochi-temeten nung nokdaka aliba taküm ka tanü arishi tempanga aoba asoshi Naga nunger rangben den Aor Linük Tenzüker Telongjem-i nemjema bilemer.

Sd/-
(Toshi Lemtur)
Convenor
Aor Linük Tenzüker
Telongjem,
NSCN/GPRN

Sd/-
(Moa Jamir)
Secretary
Aor Linük Tenzüker
Telongjem,
NSCN/GPRN

KNOWSEI GIRLS HOME

FREE ADMISSION!!

FACILITIES PROVIDED

- * 24X7 Light & Water available.
- * Free Wi/Fi.
- * Aqua Pure Filtered Drinking Water.
- * Non-Veg Every Evening.
- * Separate Toilets & Washrooms.

LOCATION: DUNCAN BASTI
NEAR TAMARIND TREE (EMLEE GHASS)
FOR FURTHER DETAILS CONTACT 8787538657

Walkable Distance To Immanuel College/Dmp.Gov.College/Connerstone etc

Tokyo Olyimpics: Mary Kom aser Manika Batra nati takok angu



Chiteni/July 25, 2021 (Agencies): World championship trok ben tashi koker aliba asayar MC Mary Kom (51kg) Olympic Games' pre-quarterfinals-i iogo. Deobarnü mezüngbuba round asaya nung arishi küm 38 tain asayari Dominican Republic tsür Miguelina Hernandez Garcia koka liasü. Mary Kom, shiba 2012 Olympic bronze-medallist lir lai iba asaya 4-1 agi la dang nungi arishia küm 15 agi tanutsü Hernandez madak takok ngua liasü. Hernandez ya Pan American Games bronze-medallist lir.

Tena tsünga asaya tetenzük nungi tatembang tashi kanga toktepa asayaogo aser

Garcia nokdangtsü atema Mary Kom-i tasa tajung aika amshia liasü. Mary-i mezüngbuba round nung la den tokteper kanga junga asadang aser tanabuba ronung nung Garcia-i tajungba asayaba sülen asaya atemtsü minute asem lia Kom-i kanga sashi sashia asaya liasü.

Mary Kom indang right hook yagi la nem kanga teyari agütsü aser lai kanga sangra asayaba ajanga Garcia-i la attack asütsüsa aküm aser meyiper lai Garcia dak kanga junga tsüngshia liasü. Dominica tsürla yagi kanga meranga asaya saka lai Mary dak kanga junga metsüngshi asaya makok.

Mary Kom taruba asaya

Colombia tsür Ingrid Valencia den asayatsü, shibai 2016 Rio Games nung bronze medal kokteta lir.

Kasa mapang nung India tsürtem rongnungi nungtugu table tennis asayar Manika Batra-i Deobarnü world number 32 Margaryta Pesotska koka tetsür kija asaya tasembuba round tongtetogo.

World number 62 India tsürla yagi mezüngbuba game ana makokba sülen 4-11, 4-11, 11-7, 12-10, 8-11, 11-5, 11-7 agi Pesotska madaktakok ngua liasü. Tena tsünga minute 57 asayaa liasü.

Manika taruba asaya Austria tsür 10th seed Sofia Polcanova den asayatsü.

World Cadet Wrestling Championship nung Malik-i gold angu



Chiteni/July 25, 2021 (Agencies): Deobarnü Budapest, Hungary nung World Cadet Wrestling Championships nung India tsür Priya Malik-i gold medal nguogo. Lai 73-kg weight category final asaya nung Belarus tsür Kseniya Patapovich 5-0 agi koka liasü.

Brehostibarnü teburtem asaya 65-kg category nung Varsha-i bronze medal ka koktetogo. Pai tasembuba jenjang atema toktepa mapang Turkey nung asayar Duygu Gen koka liasü.

Priya ya 2019 Pune Khelo India aser 2019 New Delhi

School Games champion lir.

Ajisüaka lai takok anguba ya tanga asayaa aliba Tokyo Olympic Games den meyokteper iba osang social media nung ayimsünga prokshi. #PriyaMalik ya Twitter nung trend asüba rongnung temaba jenjang nung liasü.

Weightlifter Mirabai Chanu-i Tokyo Olympics nung tetsür 49kg category nung silver medal medal ka anguba sülen Priya-i gold medal ya ngua liasü.

Union minister-i, wrestler nem tenüngsang agütsüba osang lemsatop aser kasa mapang nung Bollywood actors, yimden yimsüsürtem densema nisung aikati Priya-i 'Olympic' nung medal angu ta bilema la nem social media nung tenüngsang agüja liasü.

South Africa-i run 49 agi Ireland madak takok nguogo

Chiteni/July 25, 2021 (Agencies): South Africa-i Ireland den Twenty20 asaya tasembuba run 49 agi koka asayamung kokogo.

Linük ana tsünga one-day international asayamungbo kasasa nung tembang, ajisüaka South Africa-i T20 asayabo asemprongla kokogo. Mezüngbuba aser tanabuba asaya South Africa-i run 33 aser 42 agi koka liasü.

Final asaya nung South Africa-i asayar 2 out ser run 189 yanglu. Captain Temba

Bavuma (72) aser Reeza Hendricks (69) na senteper run 127 yanglu. Tenati mezüngbuba over 10 kanga kümdanga asaya aser iba sülen asaya yimya melenshir bowler tem attack süa asayaa liasü.

Asaya tanabuba shilem nung Ireland team-i asayar 9 out ser run 140 yanglua liasü. SA bowler tem rongnungi George Linde, Lizaad Williams aser Wiaan Mulder nungeri wicket anana agi. Ireland team nungi asayatem rongnung Captain Andy Balbirnie-i run timtiba

yanglu pai run 27 yanglua liasü.

Bavuma-i toss akok aser mezüng bat asütsü shimba sülen T20 asaya nung pai mezüngbuba half century yanglua liasü. Pai ball 51 nung run 72 yanglu, kong four trok aser six ana densema liasü.

Hendricks asayamung nung mezüngbuba asayaa liasü aser pai ball 48 nung run 69 yanglu. Pai four tenet aser six ka azük.

Kasa mapang nung David Miller-ia ball 17 nung run 36 yanglu aser pa nem player of the series naroküm agüja liasü.

IPL 2021 September 19 nü CSK aser MI na asayaa tenzüksü

Chiteni/July 25, 2021 (Agencies): 2021 Indian Premier League (IPL) season, koba Covid-19 tanaben poktetshiba ajanga taküm küm tetenzüklen thinena liasü, iba asayamung ya September 19 nü Chennai Super Kings (CSK) aser Mumbai Indians (MI) na asayaa tenzüksü, ta source balala ajanga jangjashitsüogo. Tanungba asayatem rongnung mezüngbuba ya Dubai nung asayatsü.

Asaya 31 anunga aliba ya Dubai, Abu Dhabi aser Sharjah nung asayatsü aser Dubai nung October 15 nü final asayatsü. Maneni Dubai nung October 10 nü mezüngbuba qualifier asayatsü aser eliminator aser tanabuba asayatsü. Maneni Dubai nung October 10 nü mezüngbuba qualifier asayatsü aser eliminator aser tanabuba asayatsü. Maneni Dubai nung October 10 nü mezüngbuba qualifier asayatsü aser eliminator aser tanabuba asayatsü.

Taküm küm tetenzüklen asayar aser support staff aika dak Covid-19 tashidak potetba sülen BCCI-i IPL thinentsüsa aküm.

Asayamung anena atatsü atema telemtetba agiba sülen BCCI-i sangdong ka ajanga, "Indian Premier League Governing Council (IPL GC)

asayaa Board of Control for Cricket in India (BCCI) nati jongdak senden ka nung IPL 2021 season thinentsü atema telemtetba agiogo. BCCI-i, asayar, support staff aser IPL ayongzükba nung densema alirtem tekümzükba kübok toktsüner. Asayamung dak sendaka alirtem ajak health aser tekümzükba temulungdang yur iba telemtetba agi," ta ashi.

Taoba mapang osang balala ajanga asayamung thinenba ajanga broadcast aser sponsorship dak sendakba nung BCCI-i sen crore 2,000 takoksa ajurutsü, ta metetdakja liasü.

UAE nung tanungba asayatem asayatsü atema BCCI Special General Meeting (SGM) ka nung telemtetba agia liasü.

Senden tembangba sülen BCCI-i sangdong ka ajanga, "Board of Control for Cricket in India (BCCI)-i, India nung September-October ita tsünga tzüngluruwa asünung VIVO Indian Premier League 2021 season nung tanungba asayatem United Arab Emirates (U.A.E) nung asayatsü sangdongogo," ta ashi.

England Tests nungi Washington Sundartukuogo



lokpet, pa ama Washington-a temeyong raksa. Asayar anaprongla Test series nungi tukuogo aser pei pei talidaki aotsü," ta BCCI ketdangsur kati ashi.

"Pai tanaben bowling aon tenzüksü asoshi tajemba agi hopta pungo shi agütsü aser pa England nung kecha meinyaki mungdaksütsü amajok dang," ta kasa sangdong nung shia lir.

London, Chiteni/July 25, 2021 (Agencies): England team den August 4 nungi tenzükba asayatsü aliba Test series nung spin bowler aser all-rounder, Washington Sundar shilem magitetsüsa akümba mapang, Brehostibarnü India team nungi asayar tajung ka tukua liasü.

Iba Tour nungi Shubman Gill aser Avesh Khan na tukadokba sülen, Washington ya asayar tasembuba asütsü. Osang ajanga angazükba agi, India aser County XI na tsünga first class warm up match asayaba mapang, Mohammed Siraj bowling nung onshiba sülen Washington temeyong raksa. "Avesh, shiba jemtsüba

India team den Washington mesüra Avesh nati tetibo asayadanga mali, saka net bowler ama tena ya asayar tongtibang lir aser Tamil Nadu nungi all rounder Washington-i taruba Test nung batting tsütsü junga asayatsü teimla tulu liasü.

"Avesh aser Washington naprongla tukadokba ya team atema kanga dang tesasatsüka," ta sangdong ajanga metetdaksü.

Tena melena, tanga asayar tenüng yakta sangdongtsü aser Sri Lanka series temer sülen, Avesh melena Navdeep Saini mesüra Bhuvneshwar Kumar aniokra team atema kanga tajangzük asütsü.

BILEMDANGANG

"Ochi kodanga meimbangtsü makok."